

جنرال، رفيقاتي ورفاقي بالتيار،

١ - التزكية وتجديد الثقة:

عم نلتقي اليوم بمناسبة الانتقال من ولاية رئاسية بالتيار لولاية جديدة، عملاً بنظام التيار للتداول الديمقراطي بالسلطة. هيك يكون فتح باب الترشيح قدم للجميع الفرصة بالتساوي، بس رغم الدعوات والتشجيع العلني مني ومن غيري، ما حدا استفاد من الفرصة وترشح. هيدا بيعني تسليم مسبق بالنتيجة المعروفة، وانو ما حدا عنده استعداد يخوض معركة انتخابية محسومة شعبياً. بهالمعنى بتكون التزكية ديمقراطية بنتائج حاسمة، وبتكون "اجمل المعارك هي يلي بتربحها من دون ما تخوضها". (بحسب سون تزو).

عم نلتقي تحت عنوان "تجديد الثقة"، وهيدا معنى التزكية للمرة الثالثة، لأن التيار يلي عنده حرية الخيار، حدد خياره، وخياره هو ثقة بمساري وبخياراتي التيارية والوطنية ودعوة لي لمواصلة نفس المسار. وانا بجدد اليوم التزامي نفسه قدامكم دون اي تراجع أو تنازل أو تعب، واذا حدا عنده رأي مختلف، حقه بالاختلاف او الاعتراض مقدس، ولكن ضمن بيت التيار وآلياته، لا بالصالونات ولا بالاعلام، ولما بيصدر القرار الكل لازم يلتزم فيه، ويلي ما بيلتزم بيكون حط حالو خارج النظام وتحت المساءلة والمحاسبة وصولاً لانو يحط حالو خارج التيار. هيدي حال الاحزاب وهيدي كلفة الانتساب لها ما حدا مجبور، التيار منعطيه مش بس مناخذ منه. وانا على رأس مين يلتزم بنظام تيارنا وانا المثل، وحتى لو امور كثيرة ما بتعجبني!

الثقة تبني مع الوقت ومن مطرحين: من المنطق والعاطفة، يعني من العقل والقلب. بالعقل، بعرف تقديركم لصلابة الموقف، ولكلفة رفض التنازل عن مبادئ التيار، وهالشئ متبادل لأن انا كمان عندي ثقة بصمودكم وقدرة التياريين الفعليين على التحمل والاحتمال.

اما بالعاطفة، فأنا متأكد انها عم تزيد مع الوقت من ال ٨٩ لل ٢٠١٥، لليوم. انا بحبكم فوق كل شي لأنني كرسيت حالي للتيار على حساب عيلتي وحياتي الخاصة، ومحببتكم الي بشعر فيها كل يوم اكثر من يوم - بس أكيد ما بطمح توصل لدرجة محبتنا للجنرال... مش قليلة ولا سهلة واحد يستلم التيار من بعد الجنرال، بس انتو بتعرفوا انو لا اجا ولا بيحي يوم ما بيكون فيه التيار ولبنان أولويتي، بعقلي وبقلبي.

٢ - الشكر والتقدير:

رفيقاتي ورفاقي،
هالالتزام ما بيكتمل من دونكم. الولاية السابقة ١٩-٢٣ كانت استثنائية بحجم التحديات والضغوط علينا. المؤامرة كانت كبيرة ولكن صمودنا كان اكبر، بفضل الأوفياء يليي ما خافوا ولا تراجعوا. ما بقدر سمّي الكل بس ما بقدر ما سمّي نواب الرئيس مي ومارتين، يلي اثبتوا أنّ المرأة بتقدر كمان تكون جبل، واطهروا حاجة التيار والوطن للمرأة بقوتها وثباتها ووفائها، والأهم بصدقها ومحبتها؛ وقت يلي كثير رجال هزّوا ومنهم زحلوا كيلومترات، مي ومارتين ما هزّوا ميليمتر واحد.

مي المؤمنة الصلبة تعرّضت لحملة ظالمة بس ايمانها كان اقوي من الظلم، ولهيك هي باقية معنا حاملة القضية وعم تستعدّ لمهمّات جديدة، مش اقلها ملف الجنوب.

مارتين، بعد ٨ سنين بالتنظيم الاداري، ٤ بأمانة السر و٤ كنايبة رئيس، اجا الوقت تنتقل للعمل السياسي، وعندي ثقة فيها وبانّو عندها القدرات اللازمة. العبء الاداري رح يحملو عنها غسان خوري، غسان يلي عنده خبرة بالتنظيم، وبرهنها بمساره التياري وبال LNE، وكمدبر لمكتب الرئيس، وانشا الله قريباً منعزل المدير الجديد.

بطلب من غسان، نتواجد على الارض ونتواصل مع الناس اكثر، ونعطي لامركزية مجال اوسع بالعمل الاداري، وبننظر مع مارتين، نعطي مركزية وانضباط اكثر للعمل السياسي.

التحديات قدّامكن كبيرة، واملّي فيكم أكبر، والتعب جايي!!!

- طارق الخطيب الآدمي والوطني، اكيد الظروف ما ساعدته، ولكن التواصل يلي عمله مع قيادات واحزاب على مستوى الوطن اعطى ثماره، وبدّنا يها تكثر مع ربيع عواد يلي تمّ اليوم تعيينه نائب رئيس للعمل الوطني، ومنننظر منه مزيد من العمل لتعزيز حضور التيار العابر للمناطق وتظهير صورته الوطنية بحجم كبير للمنتسبين من كل الطوائف.

ربيع، استعدّ لعمل مضني بمسيرتك التيارية.

- منصور فاضل، شيخ الشباب، وابن الارض، حضورك مع الشباب اثره الايجابي واضح - انت بتبقى لجانبي بمهمّات جديدة وبختارك تكون مستشاري لشؤون التواصل الميداني، وبعرف أنّك جاهز.

- ناجي حايك، رجل المواقف الصعبة، الصادمة احياناً والصادقة دائماً، كلامك يلي كان يجرح احياناً، كان طالع من قلب مجروح وصراحتك من حرصك... كُنّا نتنصّل من بعض كلامك يلي كان يعبر عن رأيك الشخصي. اليوم بيختلف الوضع (وما بقى فيك)، كلامك وتفكيرك رح يعبروا عن موقف التيار، لأنّي اليوم عم اختارك نائب رئيس للعلاقات مع الأحزاب الخارجية، ومهمّتك كبيرة بتشبيك علاقات التيار بالخارج.

– وديع عقل، انت اثبتت نجاحك وجراتك لَمَّا كتار خافوا، والأهم جدّيتك ومثابرتك بمتابعة ملفات الفساد وخاصةً بالمصرف المركزي والحاكم الغير مأسوف عليه. عملك وسمعتك سبقوك، وانت قدوة لغيرك، ومسؤوليّتك بتكبر اليوم باستلامك منصب مستشار رئيس التيار لشؤون الاصلاح.

ما بقدر ما اذكر نسيب حاتم، صاحب الفضل الكبير بكل انتصاراتنا الانتخابية، وبتبقى انشا الله بوصلتنا الانتخابية.

– انطوان قسطنطين الصديق الصدوق، صاحب التجربة والوعي السياسي، انا بيشرّفني اختارك مستشاري السياسي والاعلامي، وبتكون اكثر من ناطق باسم التّيار، بل ناظم لكثير من العمل السياسي والاعلامي، وموَّجه لكثير من كادرات ومسؤولي التّيار فيه.

٣ - من نضال الأفراد الى المؤسسة المناضلة:

رفيقاتي، رفاقي،

التّيار غني بالمناضلين، وتأكدوا أنّو ما بياخذ محلّهم اصحاب المصالح والنفعيين. بس التّيار لازم يتحوّل من مجموعات وافراد مناضلين الى مؤسّسة مناضلة بكل اجيالها. القدامى أساس، بس ما بيقدروا يمنعوا دخول وتقدّم الجداد - والأ التّيار لا بينمي ولا بيتجدّد بشبابه، وبيتحوّل لمؤسّسة هرمة نتيجة الانانيات والانغلاق على الذات. النضال ما بينقاس بالعمر، لحتّى ينقال لحدا: "انت مين؟ وين كنت لَمَّا كنا؟" - النضال بينقاس باستمراريته وصدقه - مش المهم المناضل اي متى بلّش، المهم لأيمتى بيهدّي - لأن النضال من اجل التيار ولبنان ما بيخلص...

التّيار لازم يكون ثابت على مبادئه يلي هني الركيزة الواقف عليها، ولكن عنده حركيته وديناميّته، وملعبه واسع بيتحرّك فيه بمرونة، مش مربّط بعقد و Taboo وموروثات معلّبة. ما حدا بيقيّد لنا حرية مواقفنا. ومثل ما انتقلنا من تحرير السيادة لتثبيت الشراكة، شراكة التوازن بين المكونات، لازم ننتقل لشراكة البناء، مش المحاصصة - هيك رفضنا من سنة كل الاغراءات بموضوع رئاسة الجمهورية. لازم نواجه افسال الاصلاح بفرض الاصلاح وبمواجهة شرسة للفساد، مثل ما عملنا بموضوع رياض والتدقيق الجنائي!

هيدا مسلسل نضالي ما بيوقف، والتّيار عم يحقق اهم انجاز بالجمهورية اللبنانية: المحاسبة ونهاية زمن الالعاب، وصولاً للعقاب الفعلي. المحاسبة مش عمل تأري بالسياسة، هي نضافة بالسياسة، وبناء مش تهديم.

٤ - عناوين الولاية والتّيّار ٢٠٢٣:

اخوتي بالتّيّار،
بمؤتمرنّا الوطني الأخير وضعنا رؤيا للتّيّار ٢٠٢٣، وانا عملت برنامجي الانتخابي للولاية الجديدة على اساسها: تيار فاعل - مجتمع قادر - كيان فريد.
تحت كل عنوان من ال ٣، وضعت مجموعة لاءات ونعم، وتعمّدت أنّ بعضها يحمل طابع تحدّي، بخيارات واضحة، للداخل وللخارج، لدرجة أنّ البعض تساءل كيف ممكن رفع هيك شعارات داخل التّيّار، وما فهم أنّها هيدي رسالة لكل واحد بيحاول عن وعي او بينساق من غير انتباه للخروج على خيارات التّيّار الحاسمة، بالعناوين الثلاثة.
- التّيّار الفاعل هو انه يبقى تيار، اكبر من حزب، وبحركة متطوّرة باتجاه مؤسّسة نضالية. هو عائلتنا الوطنية، والحياة السياسية ما بتننظم من دون احزاب. تجربة ١٧ تشرين وشيطنة الاحزاب كانت مؤامرة لتخريب العقول وضرب الحياة السياسية الحزبية، واستبدالها بمجتمع سمّوه مدني، معظمه كان مستسلم، عن معرفة او غير معرفة، لإرادة الخارج ولتمويله المشبوه. تخطينا هالمرحلة، بس لازم نفهم الرسالة يلي وجهولنا يهاها الناس الطيّبين الصادقين يلي انتفضوا ب ١٧ تشرين وعبروا عن موقفهم بانتخابات ٢٠٢٢، ولازم نتصرّف بوعي هالرسالة، ونعدّل بشغلنا ونكثف تواصلنا ونتعلم الدخول لعقول وقلوب الشباب. الأفكار كتيرة والمشاريع انوضعت بمؤتمرنّا الأخير ولازم نطبّقها.
- المجتمع القادر هو يلي بيصمد وبيبقى، ما بيبأس ولا بيهاجر. ومسؤوليتنا نساعد به بأنّو نكون مثال الصمود قدامه، ونحافظ له على كرامته اولاً، ويشوفها بسلوكنا ومواقفنا، مثل ما نحنا شغنا كرامتنا الوطنية بالجنرال وقلنا له بال ٨٩ "لأنك كرامتنا". الكرامة اساس وترجمتها باحترام حقوق "المواطن - الفرد" بالعمل والعلم، بالصحة والأمان، وبحريّة التعبير والمعتقد. الانسان قيمة بحدّ ذاته، وهون بتجي اولويّة تأمين الحياة الكريمة اليومية للمواطن. بعد كل تجارب الفشل بالانماء المناطقي، وبتأمين الخدمات ما عاد في حلّ إلا باللامركزية الموسّعة والصندوق الائتماني؛ ولهيك هالمشروعين اولويتنا لتحسين حياة المواطنين.

- الكيان الفريد هو التمسك بلبنان الكبير، لبنان ال ١٠٤٥٢ كلم^٢، حتى لو كنا بحاجة لاعادة بنائه ولتجديد الفكرة اللبنانية وصوغها حول انتمائنا أي "البنانية" - Lebanon. ما منقدر نعيش بكيان نهائي، وبوطن دائم اذا ما اكدنا هويتنا وانتمائنا لرابط وطني بجمعنا، وهو فوق الطوائف، وفوق الفينيقية والعروبة والمشرقية والمتوسطية. ما منقدر نحافظ على وطننا اذا هاجر كل شعبنا وتم استبدالنا بشعوب اخرى ولو كانت جارة وشقيقة،

ولهيك موضوع النزوح واللجوء سمّيناه خطر كيانني واجبنا نواجهه بقساوة وبرفض حاسم شو ما كانت الكلفة. ولهيك مندعي لتحديد وطننا عن صراعات وايدولوجيات ما له علاقة فيها وبتجبله الضرر بلا منفعة! ولهيك لازم نتفق على دور للبنان بيحفظه، وبيجاوب على اشكالية المستقبل وكيفية استنهاض الدولة؛ وابسط مثل، وين موقع لبنان بالمنافسة الدولية المفتوحة بين مشروعين استراتيجيين: طريق الحرير بقيادة الصين من آسيا باتجاه المتوسط واوروبا، والممر الأخضر بقيادة اميركا من الهند للخليج للمتوسط وصولاً لأوروبا. منبقي على الهامش خارج المشروعين او منثبت دورنا من خلال المشرقية الاقتصادية، المنفتحة على التعاون مع الطريقتين؟

بالخمسينات والستينات، استفدنا من فورة النفط بالخليج وتصديره باتجاه اوروبا عبر انابيب ال Tapline بالزهراني وال IPC بالداوي. هل مسموح بعد ٧٠ سنة ائو نغيب او نُغَيَّب عن العصر الجديد؟ بسبب انعدام اي فكر استراتيجي للمنظومة يلي ما بتشوف الا مصالحتها.

بال ٤٨، دفعنا ثمن نكبة فلسطين حتى وصلنا لحرب ال ٧٥، وانفرض علينا لجؤ مظلومين بعدنا عم ندفع ثمنه لليوم - هل مسموح ان ندفع من جديد بعد ٧٥ سنة ثمن صراعات فلسطينية داخل مخيمات على ارضنا بيغذيها الخارج، وبتودّي لمخاطر جديدة؟ هيدا كمان بسبب منظومة بتبدي مصالحتها على السيادة الوطنية.

بالثمانينات، دفعنا ثمن الحرب بارتفاع الدولار من ٣ ليرات لـ ١٥٠٠ ليرة، وثمان الفسار بال ٢٠٢٠ رفع الدولار لـ ٩٠ الف ليرة. هل مسموح ان تنهار عملتنا ٣٠ الف مرّة؟ كل هيدا بسبب منظومة، عبّت صناديقها الخاصة على حساب صندوق الدولة وودائع المواطنين!

ما رح نقبل تتكرّر اخطاء الماضي ونتفرّج عليها؛ نحنا مصمّمين نصنع مستقبل مختلف لشبابنا، لأن اذا قبلنا او سكتنا، في مين بدو يبقينا تحت رحمة المنظومة، وفي مين بدو يرجعنا للحرب. والاثنين مرفوضين.

ه - الرئاسة واولوياتها:

اهلي اللبنانيين، الجواب على كل الهواجس والأسئلة موجود بورقة الأولويات الرئاسية يلي كتبناها من سنة، وبتعني ائو برنامج الرئيس اهم من شخصه، خاصة اذا كان هذا الشخص، مثل ما هي حالنا اليوم، ما بيتتمّع بالحيثية التمثيلية الذاتية، وعلينا التعويض عنها بدعم نيابي وشعبي.

من هون وجوب التخلي عن منطق الفرض، والانتقال لمنطق الحوار والتفاهم. لا فريق الممانعة قادر يفرض رئيس ما بيمثلنا وما بيمثل وجداننا وناسنا، وثبت أنو هيدا مستحيل فرضه لا من الخارج ولا من الداخل. بنفس الوقت، فريق المعارضة ما بيقدر يفرض على فريق الممانعة رئيس تحدي يبرر له مخاوفه، ومن الاساس هيدا مستحيل. وهون منطق الحوار والتفاهم بي فرض حاله اذا اردنا الخروج من الفراغ والانهيال - اللهم الا اذا كانت نية فريق يخلينا بالفراغ، ونية فريق ثاني يوغي كوابيس الماضي.

لهالسبب، الأولويات الرئاسية هي خارطة انقاذ. تعوا نتحاور فيها وملتزم بشو منتفق عليه، مثل ما عم نعمل مؤخرأ مع حزب الله. تعوا لحوار حقيقي، والا بلاه ونحن ما منشارك فيه، حوار غير تقليدي وخارج طاولة مستديرة ورئيس ومرؤوس! بي قدر ياخذ شكل مشاورات وتباحث ثنائي وثلاثي ومتعدد الأطراف، من رؤساء الأحزاب اصحاب القرار، بمكان محصور وزمان محصور وموضوع محدد، بيوصل لانتخاب رئيس اصلاحي بمواصفات اصلاحية على اساس البرنامج الاصلاحى المتفق عليه. رئيس بتجربته وسلوكه بيملك مشروع لتحديث الدولة، وبيحمل رؤية وطنية، وبيكون مشبع بمعرفة لبنان وخصوصياته وقوانينه ودستوره؛ رئيس ما بيستحي مستقبله من ماضيه، وبيكون صاحب قيم ومبادئ. رئيس يفهم الطوائف وبيلجم الطائفية، رئيس متصالح مع نفسه وقادر على مصالحة اللبنانيين مع انفسهم ومصالحة لبنان مع محيطه العربي والمشرقي ومع العالم. رئيس يفهم اللامركزية على حقيقتها كحاجة انمائية مش تقسيم ولا فدرلة بل مشروع اصلاحي تنموي. رئيس يفهم الصندوق الائتماني على حقيقته بأنو ممتلكات الدولة مش للبيع، بل للحفاظ عليها ولتكبير الإيرادات ورفع مستوى خدمة الناس؛ هو طريق للخروج من الانهيال، ومش الاستمرار فيه وبلغ ما تبقى من الدولة.

تعوا نعيد تكوين السلطة على ركائز الشراكة مش المحاصصة، ونفكر بحكومة اصلاح بتملك برنامج وخطة عمل واضحة للانقاذ المالي والاقتصادي. تعوا ملتزم جميعاً (علانية)، وعلى رأسنا دولة رئيس المجلس النيابي، بأن يعقد المجلس بنهاية الحوار المحدود زماناً، جلسات انتخاب مفتوحة نكرس فيها اما اتفاقنا على الاسم، اذا حصل، أو ملتزم بالتنافس الديمقراطي للانتخاب بين المرشحين ونقبل النتيجة حسب نص الدستور، وما نخالف الدستور من البداية، لأنه شو قيمة الوعود بالحفاظ على وثيقة الوفاق الوطني والطائف، وشو قيمة الوعود ببناء دولة القانون اذا بلسنا العهد بمخالفة الدستور بجلسة انتخاب سيد العهد يلي ببيلش عهده بقسم يمين على عدم مخالفة الدستور!!! واذا الغرب بدو يفرض عليكم رئيس بخلاف الدستور، خدوا منه على القليلة التزام علني (برفع الحصار عن

لبنان) والأهم بآلية واضحة ومسبقة لإعادة النازحين الى بلدهم، مثل ما نحنا عم نطالب مسبقاً باللامركزية والصندوق مقابل مرشحهم!!! وهون، تعوا نتعهد علناً انه في حال تعذر علينا، بسبب ضيق الوقت، اقرار قانوني اللامركزية الموسعة والصندوق الائتماني قبل الانتخابات الرئاسية، منلتزم باقرارهم كألوية بالعهد الجديد. هالقانونين حماية حقيقية لوحدة لبنان وتحقيق فعلي للتنمية والازدهار. النظام المركزي حوّل لبنان لمناطق نفوذ للسياسيين وصارت منازل الطوائف اقوى من البيت اللبناني - اختبرنا نظام المركزية الزائفة يلي اضعفت وحدة الدولة لمصلحة فيديرالية المصالح. هيدا النظام بحقيقته نظام فساد وتسلب ومحاصة؛ قسّم الناس ورهن حقوقهم بالولاء للزعماء ووضع اللبنانيين بمواجهة بعضهم البعض وباعد بيناتهم لدرجة انو البعض راحوا يتخيّلوا انو الحل هو بالانفصال. هيدا نظام غدّي خطاب التحريض والتخويف من الآخر.

تعوا نختبر اللامركزية الانمائية، يلي منها انسلاخ ولا انفصال، بل هي انماء وعدالة تنمويّة؛ هي جزء من الحل وليست كل الحل. الحل المتكامل بيعني دولة مركزية قوية بنظام لامركزي اداري ومالي. اللامركزية بتثبّت الناس بارضهم وبتفعل قدراتهم وبتحفز عقولهم وطاقتهم، وبفعل الشفافية، بتمنحهم القدرة على محاسبة مين بيتولى مسؤولية الادارة. اللامركزية انماء مناطقي بتكامل مع الصندوق الائتماني بالانماء الوطني. الصندوق الائتماني بيجعل اصول الدولة وممتلكاتها ومرافقها بأمان. هو مشروع اولاً لاحصائها ومعرفة قيمتها ومن ثم ادارتها واستثمارها لزيادة قيمتها وزيادة عائداتها، وهيك بتكون رافد لتكبير حجم الاقتصاد ورافعة للدولة مش عبء عليها. من دون هالخطوة الاصلاحية لا يمكن تحقيق المشاريع الكبيرة كالمطارات بالقليعات ورياق وحامات، والمصفاية والمرفاً والمنطقة الاقتصادية بطرابلس، والمرفاً السياحي بجونيه، وسكك الحديد والكهرباء والمياه والطرق واماك الدولة البحرية والبرية وغيره... مع الصندوق واللامركزية بتتوفر البيئة الحاضنة للاستثمار والتنمية والازدهار.

٦ - كلمة الى التياريين:

ايها التياريين،
كل مرة بوقف قدّامكم، بشعر بهيبة المسؤولية تجاهكم وبفرح حملها بنفس الوقت، لأنني بشعر بدفاء العلاقة والثقة بيناتنا. نحن ما عنا خيار عدم تحمّل المسؤولية تجاه بلدنا وشعبنا، لأنّ ناسنا متكّلين علينا وبيشوفوا خلاص البلد من خلالنا. ما منقدر نبني بلدنا اذا ما عرفنا نبني تيارنا، ليكون البلد والتيار على صورة بعضهم: فيه حرية حدودها حرّية غيرنا، فيه حق الاختلاف مرتبط بالانضباط والانتظام العام، فيه الطموح الشخصي بيوقف عند حدود مصلحة الجماعة، فيه التنوّع غنى بس بيتحوّل لخراب اذا فيه تفلت، وفيه الاخلاق اساس التعاطي، منكون بتيار مش بتيارات متل ما منكون بدولة مش بدويلات، وفيه وفيها استقلالية مش تبعيّة، وفيه وفيها كرامة مش ذلّ، فيه منتسبين احرار وفيها مواطنين كريمين مش مقهورين...
اتكالي عليكم لنحفظ الأمانة والقضية، واتكالكم عليّ لحافظ على الثقة المتجدّدة بالتزامي.

٧ - كلمة الى الجنرال:

جنرال،
كل مرة بوقف قدّامك، بشعر بهيبة الأمانة يّلي سلّمتنا يها بال ٢٠١٥، وبفرح وبفتخر اني حملتها من بعدك... ثقتك فيّ من وقت عملت وزير بال ٢٠٠٨، شالت النوم من عيوني والوقت من قدّام حياتي، وخلت تلبية الواجب مغروسة بعقلي وشرف الخدمة مزروع بروحي. انت ربيت على شرف، تضحية، وفاء ونحن ربيننا معك على كرامة، سيادة وشراكة. نحن منشوف الكرامة الوطنية من خلالك، وانت فيك تشوف التيار القوي من خلالنا. نحن منشوف لبنان القوي من خلالك، وانت فيك تشوف التيار القوي من خلالنا. انت المدرسة الوطنية ونحننا جيل عون، انت حملتنا الرسالة والرسالة معنا بتوصل!!! بلشنا معك حرية، سيادة، استقلال، وكملنا كرامة وشراكة واستقلالية!!! معك مكمّلين، وبفكرك مكمّلين... نحننا شعب ما بيبأس ووطن ما بينتهي... نحننا القضية يّلي ما بتموت، نحننا التيار يّلي ما بيركع، نحننا لبنان يّلي ما بيخلص!!!

عشتّم، عاشت التيار وعاش لبنان